



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

34. Kalenderwoche – ab 22. August 2010

Jedn Daach Weldunnorgang

Isch weeiß jedzde nisch, ob Sie ooch so sähr sennsiebl sinn? Ja? Nee?

Abor was ehm misch bedreffn dud... - isch bin sowas von sennsiebl! Von Naduhr hähr!

Das dud ooch meine Gudste immor sachn, wenn isch eingeschnabbd bin un misch dann weischorn du, frehlich zu sein. Nee, wenn isch eingeschnabbd bin, kann isch nisch frehlich sein. Da sidz isch dann mirrisch vor dor Glodze un schweische nachdrigglisch.

Zwiebelchen - Sennsiebelchen, sachd die dann zu mir!

Naja, isch hab mir schon mei ganzes Lähm lang immor alles sähr zu Härzn genommt. Isch war schon vor dor Wende sähr sennsiebl! Un wo dann zum Beischbiel dor Sozialismus vorn Boom geloofn is, da bin isch sähr lange sähr draurisch gewähsn. Abor dann habsch das ieborwundn - da sinn mir dann... also, isch un meine Gudste!... da sinn mir ieborall da hingefahrn... in de Schweiz, nach Norweeschn, nach Schbanjen... ieborallhin, wos ooch im Gabidalismus scheen is!

Nee, das Elend in Afriga habsch mor liebor nisch angeguggd. Un ooch die arm Schweine in de USA... die bis heide noch gloom, dass se in Goddes eischnem Land lähm... nee, das Elend wolldsch nisch sähn. Nee, daderzu bin isch werglich zu sennsiebl! Wenn de dir anguggn mussd, wie die arm Leide dord lähm missn... un du bisd mid vier Schderne im Hodell... - nee, abor sonsd had dor Gabidalismus durschau ooch hibsche Seidn offzuweisn!

Un das is ooch werglisch guhd fiehr jemand wie misch, dähr so sähr sennsiebl is! Wemmor andauornd bloß midleidn muss mid annre... die irschendwie in dor Glemme sinn... da kannsde werglisch eschd krank wern! Odor ehm Scheuglabbn offsedzn!

Off dor annorn Seide hab isch abor in ledzdor Zeid gemärgd, dass isch irschendwie abgehärded bin. Dass isch irschendwie eene Hornhaut gegrischd hab - so off dor Seele! Bei einische beese Ereischnisse, die de Egsisdenz dor Mänschheid un dor ganzn Ährde bedrohn dadn, da bin isch bledzlish ganz guhl gebliehm!

Zum Beischbiel als vorsche Wochen dor Dax widdor um e baar Brozendingde abgesaggd is un das Ende dor bordugiesischn Wirtschafd gedrohd hadde... - isch bin ganz guhl gebliehm! Odor ooch weeschn dähr Ehlgadaschdrophe im Golf bei Mexigo... - isch bin guhl! Odor wo dor Ballagg sisch de Färse gebrelld had... gurz vorm wischdischn Schbiel geeschn Waggor Burghausn... - isch bin guhl gebliehm! Odor wo dor Roland Koch zurigg gedrähdn is... - ooch das had misch nisch groß erschiddord! Un wenn nächsde Woche irschendwo de Gardoffldollwud ausbreschn däde... odor wenn dor Rindorwahn in mudierdor Form off de geschdreifde Wiehlmaus iborschring däde... - isch gloobe isch däde ja sogahr guhl bleim, wenn meine Gudste mir mid Scheidung drohn däde! Ja, so abgehärded bin isch nu schon. Un wenn werglisch eenes Daaches dor Weldunnorgang eindrähdn däde... - isch däde sowas von guhl bleim! Naja, das is villeischd kee Wunnor, wenn jedn Daach bei jedm Bubs dor Weldunnorgang ausgerufn wern dud... - da gewehnsde disch ehm dran!

Eduard Sachsenmeyer